

Guata Obet Mitinand

Gschätza Präsident Herr Jeker

Gschätzti Vorstandsmitglieder

Gschätzti Gäscht

Liabi Valentina

I han dia Ufgab kriagt hüt Obet dia Laudatio für d Valentina z halten. As freut mi natürlich sehr, do als grossi Schwöster z stoh und a paar Sacha über d Valentina töffa z verzella.

Foto 1

Am 2. Mai 1999 isches aso wit gsi und mini kli Schwöster isch entlich ufd Welt koh. Ab sofort bini dia gross stolzi Schöster vu dem klina Lusmeitli gsi.

Foto 2/3

D Valentina isch z Rhäzüns in da Kindergarta und in Primarschul ganga. Abem Muki Turna mit dr Mamma isch si aktiv worda im Tunverein z Rhäzüns, si het im KITU mitgmacht und spöter Meitlariga. Bis si den in dr 6. Klass mitma Flyer haikoh isch vum Sportschüssa in Bonaduz. D Mamma und dr Papa hend si dazu ermuetigt, dass si das doch amol söll ga usprobiara goh. D Valentina isch mitem Papa also in z erste Training vu da Jungschütza ganga und isch mit strahlenda Auga heikoh. Si het dr Mamma und miar vu dera coola und fasziniarenda Sportart verzellt. So het das ganza Abentür agfanga.

Nochem erste Jahr Oberstufa in Bonaduz het sich d Chance ergeh in d Talentschul uf Ilanz z wechsla. Dia erste paar Wucha isch si aber gar nid begeisteret gsi, do ufem ganza Pausaplatz praktisch nur romanisch gredet worda isch. Dia ganz Familia het mit ihra in dena erste Wucha mitglitta. Trotz allem het si sich durakämpft und fliessig mit ihrem Trainer Giusepp an ihrem Traum, amol zu da besta Schütza z ghöra, witer gschaft. Noch dr Oberstufa, het d Valentina d Lehr als Zeichnerin Ingenieurbau bim Ingenieurbüro Perez z Bonaduz gmacht und im vergangena Summer erfolgrich abgeschlossa. Durch ihri Sportlerlehr und dr Unterstützung vum Thomas Gilardi an dr GBC het si au während ihrer Lehrzeit viel und gezielt als Mitglied im Schweizer Nachwuchskader trainiara können. Während dänä Jahr het si a hufa erfolg töffa fiira.

Foto 4

Z erste grossa Highlight isch im Jahr 2017 gsi. Si het sich grat für zwei grossi Wettkämpf qualifiziert nähmlich wür d EM in Baku und für d Juniors WM in Suhl.

In Baku het si vor Ort ufd Unterstützung vum Papa können zella und natürlich sind au d Mamma und i dahai stets ufem Laufenda gsi dank da verschidene Livekanäl und da nervösa Arüaf vum Papa. Mit zfridastellenda Resultat isch d Valentina vu ihrem erste grossa internationala Wettkampf heikoh mit dr Hoffnig, dasses nid dia letzte EM Teilnahm gsi si wird.

Foto 5

Uf dia zwei grossa internationala Wettkämpf isch d WM in Changwon in Südkorea gfolgt. Miare hend dia WM vu dahai us verfolgt. Weg dr Zitverschibig simmer mehreri Nächte am 3i vorem Laptop ghockt, und i kann eu säga i bin jo schu nervös gsi aber neb mina Eltera sona Wettkampf luaga brucht Nerva. Kurz vor Wett-

kampfbeginn isch denn d Meldig koh, d Valentina hät a Magadarmverstimmig. Das hät üseri Nerva natürlich no meh strapaziert. Umsomeh simmer erlichteret gsi wo miar dr ersti 10 uf dr Schieba gse hend. Ab dem Zeitpunkt hend miar gwüsst, sie wird kämpfa und dä Wettkampf durazücha. Sie het schu döt zeigt, dass sie Kniend und Liegend mit dr Weltspitza mitheba kann. Miar hend alli a risa Freud kah, womer am Flughafa ihri Rückkehr vu ihrer erstä WM hend könna fira und si in Empfang neh.

Foto 6/7/8

Ihra wohl wichtigsti und erfolgreichsti Wettkampf, isch wia iahr vielleicht wüssend an der EM in Bologna, im vergangena Summer gsi. Miar hend gwüsst, wenna ihra einigermassa lauft, könnti bi dera EM a guata Platz dinnalika. Si het nehmlig in da letzta Training a grossa Knopf oftua und as isch anra vu nunan au in dr Stehendstellig glunga guati Resultat z erziela. Somit isch alli Hoffnig ufam Drei Stelligswettkampf glega. Mini Eltera hend also mit Ihra abgmacht, dass dr Papa vu Afang ah mitgoht und d Mamma denn a Tag nochem erstä Wettkampf nochareist. Aber soa Wundertüta wia d Valentina isch, het si üs natürlich a gwaltiga Strich durch d Rechnig gmacht. D Mamma und i hend also dr Liegendwettkampf über d Livekanäl verfolgt. Nocham missglückta Start hettsi ab dr zweita Passa d Kurva kriagt und ihres Könna abgruafa. Ufzmol schüss si 10er an 10er und kämpft sich uf da dritti Rang füri. Und beendet ihren Wettkampf 619.3. Miar hend erkennt dass d Chance ufa Bronzemedallie do isch und hend gespannt witergluagt was dia andera schüssend. Ufzmol hets an Umbruch geh uf dr Ranglista und d Valentina isch an erster Stell gstanda.

Foto 9

As isch üs vorkoh wia inra andera Welt wo miar am nöchsta Tag dr Valentina in Bologna zu ihrem Doppel Europameistertitel hend könna gratuliara. Z tüpfli ufem i het si mit ihrem Fründ am Lukas im Mixed Team Wettkampf mitem gwünna vu dr Bonzemedallie gleistet.

Foto 10

D Valentina het soviel Durchhaltewilla, Ergiz und vorallem verfolgt si dä Sport und ihri Traum mitra risa Freud. Miar bewundern sie wia sie das immer alles unter ein Huat bringt und au nebed bi no Ziit het zum öppis mit dr Familia z unterneh. I denka i reda do im Nama vu dr ganza Familia, dass miar diar uf dinem witera Weg jetzt in dr Spitzasport RS und au nochrt alles guati wünschend, dass du dia Freud für dä Sport und d Kraft all dini Traum z verwürkliche nia verlüsch. Du weisch, dass miar immer stolz sind uf di egal was du machsch.

(Liabi Valentina du bisch nid nur mini kli Schwöster und mini best Fründin, du bisch au mis grössta Vorbild.)